

Seyîd Rıza

Serdar Roşan

bi koyanê berzan
gelîyanê xorînan
dereyanê dûran
çemê sey munzirî
dêrsim

xemlê to sey dotmîran
sereyê to berz o sey pismîran
zozananê to de xezalî çerenê
merg û palanê to de vereki kalenê
serê zinaranê to de zerecê marî wanenê
wisarê to yo, gul û vilî sey heme serran ê

lo dêrsimo
ti yî warê bazan
ti yî hozanan rê mekan
ti bi name û veng î
ti sey xortêk çeleng î
ti tersê zerrîya romîyan î
ti serran ra, yê serra hîris û hewt û heştan î

erê dêrsim
ti zî birîndar î
ti zî xeşim û bêyar î
sey pî û kalan zerrîpak û hejar î
seba şerefê xo sereyê xo berz kenê, neçar î

rayîr û neqebî pêro girewte yê
şervanê seyîdî tede nimite yê
rayîr nêdanê romîyan
vîyare çinê yo mîyanê newal û gelîyan
romî zexel ê
wazenê ronê dehfikan
seyîdî rê xebere şawenê
vanê, bêre, ma adir tefênenê

meşo seyîd meşo
bextê romî çinê yo meşo
wa elîşêr û zarîfa bêrê vîrê to meşo
bewnî tarîxî ra meşo
rom xayîn o gidî meşo

seyîdê mi werişt şefeqê sibayî
hêviya ey bî, walîyê erzinganî
wa bêro, vatibi alpdoganî
seba seyîdî faqe ronaybî

seyîd ard kerd zindan de
înan veng da ey meydan de
heme cayan de kerd halan

va, ma girewto bazê kalan
bizanê ma do tim vergê harî bê
şîma zî do hergu hewe şamiya maran bê

saete duwesê şewe
seyîd berd dadgehe
qerar da înan a game
do îdam bikerê, a sehere

înan ard rasteyê sêdare seyîdê min
reşîk huseyîn uca bi, lacê seyîdê min

reşîk xortêko ciwan û çeleng o
porê ey bereqêno hewtreng o
reşîk xortêko delal û ciwan o
temenê ey, yê hewtês serran o
pay de puncê dergê nexşînî
manenê nexşeyê kurdîstanî
înan reşîk berd verê çîmanê babî de
xeleka sêdare kerde milê ê lacî de
reşîkî verê xo da bawoyî
va: bawo, wa miletê kurdan weş bo!

seyîd leze şî verê sêpîke
sereyê xo kerd xeleke
darê binê lîngan ro, paskilêke da
o wext ruhê xo verada
seyîdê min dorê xo geyra
awire ey ewnîyayne reşîkî ra
çîmê ey akerde mendîbî
ewnîyayne hetê dêrsimî ra

romîyan va, halan û talan o
bigîrê, bikişê, biveşnê nê belayan
û eşt serê dew û banan
ne va kal, ne pîr, ne ciwan
dayî xo ver sey revdê vergan
kênayê xamayî, vêkê destbiheneyan
zinar û devîyan ra xo eşt înan
semedo ke nêkewê destê romîyan

awa munzirî bibî sûre
hene nêbi, gonîya xortanê derûdore
dêrsimicî remayî bi koyan
da înan dima verganê haran
şikeftî pîrr bî, bi doman û kal û pîran
romîyan ê girewtî sey êsîran
fekê şikeftan girewtî
zere de, ê bi adir sotî

zere ra ameyne vengê hawar û fixanan
kal û pîrî, torinî veşayne sey dar û maxan
no bi medenîyetê romîyan
nê bî tedîb û tenkîlê înan
na bî komara vergan
na bî serre hezar û new sey hîris û hewt û heştan *

Swêd, hamnan 2005

(*)Na şîire seba vîrardişê Seyîd Rizayî û hevalanê ey ê kurdperweran nusîyaya ke dewleta tirkan roja 18 teşrîne 1937 de ê îdam kerdî.

ZAZAKÎ.NET

"Merdim bi reng û vengê xo rindek o"